

鄒平縣志卷四

建置考上

古司空之職辨方正位建置所由設也縣之建置自
元以前不可考舊志作於明嘉靖十有二年城池學
校壇廟官署兵驛坊表之屬事關政體者始志於牘
國朝畧有因革多仍舊制故創始重修之人與時代年
月之可考者統紀諸編蓋徵

王制之覃敷稽典章之燦備邁古特隆非第不忘始事
云爾

城池

城池之建於今理也未詳所始考漢晉隋唐梁鄒
鄒平故治并在今理之北境城郭創立於此其在
宋金之間乎夫

國家承平百餘年矣無須增陴爲守也然修鑿大事
史冊必書殆不以太平翔洽而忘金湯之鞏固焉

鄒平城周圍四里高三丈八尺上濶一丈二尺下濶
三丈舊以土爲垣甃爲堞今垣以石堞以甃門四東
曰通齊南曰興賢西曰迎恩北曰仁義瓮城二門

東西門

戊樓四砲臺十柵門四堞一千二百八十懸溜一百

五十九池匝城下濠深濶皆尋丈通水橋一

南門外

倚

黃山環長白腋黛水引白條帶小清襟湖濼北眺川
原東通海道西挹溪山之烟雨南瞻嵐壑之雲霞洵
勝地也

元至正十二年縣尹陳埜仙修縣城

張崇文記至正十有二年八月乙未朔尹歷下陳
彥武命作城爲門東西南北各一屋以楹計者八
闔以枚計者十有二規制端敞勢壓崇墉殆如天
設越十月乙卯落成邑民咸籍首賀崇文時職縣
庠謹采輿論以紀成績系之詞曰維昔梁鄒土沃
民殷望於他邑閱歲滋久城廢不修西鄙陸梁夜

入焚劫民庶嗷嗷孰究其居時維陳公受命來牧
仁涵義操姦慝清肅變呻爲謠旣庶而封人力有
餘百廢斯舉乃咨邑士爰作城局景功命曰戒以
勿亟民役弗除事如子趨輦石掄材爭先有期自
旭至晡役罔有怠厥功告成實堅實麗邑民改觀
罔不瞻聳以固屏藩以扞寇侮明明天子嘉惠我
民繫公之力是布是宣長白峨峨灤流湯湯天子
萬民荷茲多祉乃刻珉石以誦厥美尙俾來者知
作者之所自

明萬歷八年知縣李瑞重修縣城易置塼堞石墉

呂坤記鄒平有縣至今千六百年增以崇墉甃以
堅石則自萬歷八年邑令李侯始始侯之來也登
城城隘不可以車圯者有牛羊跡出入者攀躋以
行不請關鑰每歲議修修輒壞壞復議修計歲歲
費不減數萬前令憂之議以歲歲費費以一歲新
其城計亦不減數萬父老曰諺云履常補其值可
新而貧者必補補費廉而常補之費易辦也民力
不能新矣請罷萬歷戊寅汝南趙公來撫山東下
郡國城城亟不可罷於是李侯爲令歲餘矣父老
以爲憂謁侯罷其事如謁前令者侯曰無以城爲

也則罷之便如用城則作之費視罷幾何乃以憂
二三子耶明日下令度之城環六百六十丈下廣
丈餘土廣三尺有咫土堞城內外片石一磚無有
也公集父老於庭謂之曰茲城也吾欲厚之下倍
二上倍五易堞以磚被城以石可乎衆愕然曰是
前侯議數萬之所未及者也問歲修之費幾何曰
千餘金侯曰吾欲以一歲費已歲歲費令千百年
不復費可乎衆益愕然曰是犒工具器而猶不足
也侯曰第爲之是時括公家積得銀千八百兩穀
二千五百石侯泰然無憂也曰是當有餘城城下

廣三丈上廣一丈二尺懸溜一百五十有九隅城
四堞塼爲之高濶如舊之半凡一千二百有八十
柵門十六警舍十八通水橋一斫山砌城固以焚
石蒙茸之草不根焉其丁夫每三人城一尺客戶
三日役主戶五日一踐更終始役其督工官三人
耆民十六人其匠木十石十有八其器物爲索之
糴百斤人出草五束得輓一十九萬稅間架錢一
百四十千得灰九十三萬上工則家戶持畚鍤一
人持木一工已還之其費銀五百五十餘兩粟四
百六十石其興作僅五閱月而鄒平遂稱金湯云

始驗封大夫張鳴春一元鄒平人也與余同年友
又爲郎同舍歲庚辰大計天下郡邑吏語及侯鳴
春爲余悉其事如此余嘆曰此天下才也因民之
力與財而督責是亟怨乎曰否侯之信於民也三
自常祿外一介不取諸民贖鍰幾絕而人信侯之
廉里之地瘠而民貧者悉籍爲役食其兩徵通邑
之兩徵者又食之流移復逋負完而人信侯之約
門外有待鞠之人侯雖饑不退食堂下有枵腹之
卒侯雖歡不竟席而人信侯之仁役之日以節省
爲施予以獎勞爲鞭朴歲寒弛役風雨弛役農時

弛役人勇於赴事也如乘屋樂於效其有也如衛
邑誠貧不告疲也城南城而有餘懽又何怨余嘆
曰使民有道得其道雖令赴湯火可也宋人乃以
一臺賈怨豈不悲哉侯名瑞林縣人太宰王公通
家子不通謁及以最績徵又爲權貴所銜授大理
司評事其操尙如此今改工部員外郎事敏功精
節財恤下籍甚有賢聲城其一事云

明崇禎九年增置子城礮臺

張延登記鄒平城周三里許委土耳其萬歷己卯縣
令李公瑞始斲石而堞之崇禎辛未東牟戌卒至

吳橋反戈連破新城等六縣鄒平獨仗城僅完於
是當事檄諸郡邑人自爲守邑人張延登劉開文
孫燠等請於令君倡諸士紳伐黃山虎崑之石剏
子城四座礮臺十座各如城之高餽糧灰料靡金
錢二百三十餘萬士紳省饗殮爲之一毫未歛於
里甲丙子二月起次年三月訖工新令韓公爲之
聞於上臺以竣其事或謂是役也卅金湯竟前烈
節民財一舉而三善具延登乃述其概大書鐫石
以告後人詳載碑陰

碑在西門甕城中

國朝乾隆三十四年知縣裘鵬重修縣城

裘鵬復南門記余以乾隆戊子秋蒞鄒平卽承修城之役明年二月購材經工傭增厥值不煩斯民遵憲諭也諸務旣舉紳士耆庶咸來投牒以邑南門初峙巒右繼以浮議遂移宮前達道紆阻櫺星直衝士風漸替科第弗常請復初制用利民人咨之羣吏與董事者僉謂術言難據且帑已不足復之增費計無奈何余曰陰陽相宅在古恪遵初制或善苟利斯土且勉圖也乃延堪輿循隍諦視迤西百步旣掀閱之故跡宛然申于大憲大憲以俞遂增工作厚集厥基地勢旣隆崇墉彌壯又門外

大橋往來輻輳頻修頻壞常以病民乃因斯役易木以石行旅以愉號謂萬年門署興賢仍斯舊稱宮牆內煥峯巒外環相與映帶麗譙濠梁鬱爲鉅觀是秋售者四人舉境欣幸歸功斯門之役余惟地形擅勢山川効靈揆斯所由則惟人興近者吾人砥礪弗改庠序振興彙征拔茅

缺一字

甲與科蓋

丁是時也稽邑先民功在經籍俎豆學宮則有伏博士自是之後英傑時出節概行義事業勛名表諸志乘有足慕者其係於城池巖序形勢善否蓋不可知夫山川孕秀今非讓昔則昔人惡得專美

若彼繼往開來垂光簡策如傅士尙矣亦爲之而
已則夫積學鴻文求如缺二傳節義政績求如周
萬卿功業如景平章仁孝如鮑飛熊清德如張慎
與後先濟美俾科第名籍缺四邑里改觀於以上
副

聖朝興賢造士至意與諸憲屬望都人士盛心而吏斯
土者亦賴以增聲而引重也邑君子其有意乎是
四門分峙初制之善相形定規而斯門形勢脉絡
尤擅一邑之勝竊慮他日踵修者或因浮說復有
更易也爰綴詞勒石永垂後禩并贅私衷以諗邑

士大夫云

馬驕曰昔夫子繫易之坎曰王公設險以守其國而春秋特書莒潰之文以爲不備之戒夫自大道隱而世變生戰爭多而守禦始是以城郭溝池先王所必謹也往者已卯之役郡邑并皆失守惟此與章邱藉城得全溯尹鐸之遺勞推子囊之舊畫今邑之士大夫多有能言其事者語曰前事不忘後事之師也守斯土者可不念哉

成啟洸曰鄒平城自前明萬歷八年李侯重修之後崇禎間雖有增置而未嘗全修也距國

朝乾隆丙戌一百八十餘年數歷兵燹从湮風

雨雉堞傾圮土壘僅存出入攀躋以行不請關
鑰誠有如已坤所云者歲丁亥江西裴侯鵬始
攝鄒篆卽磨修城之役請領公項不符支用侯
自索其家賠贖銀二萬餘兩垣堞門樓懸溜濠
塹尋尺之數悉如舊制南門外通水橋模隘而
梁圯侯更斷西山之石宏其規岸設石堰以圖
永从己丑大工始竣數歲之中鳩工庀材登憑
削築日役千人而四境之內鷄犬無驚一毫未
斂於里甲鄒平之城成裴侯之家敗矣昔李侯

以金五百餘兩穀四百餘石五閱月而工已就
豈今昔之間物價不齊時勢異致使然與何昔
之易而今若斯之難也

縣城內東西南北大街經緯皆直城門相對

縣東西二關當孔道之衝民舍殷繁商賈輻湊月以
三八日輪集貿易均錢穀通有無革牙行免市稅以
便民也一六日西關有小集南北二關年終有集

陳鳳梧過鄒平詩石磴縈紆深復深空林啼鳥忽
聞音連雲秀巘還青黛夾道垂楊自綠陰宿雨已

全消暑氣清風時復淅煩襟民謠土俗頻勞問徧